



EDITORIAL

Magpursige atubangan han pasista nga pangatake, pahugton an pakig-usa han BHB ha masa ngan pakyason an todo-gerra ni Duterte!

Ginsasaludaran han mga rebolusyunaryo nga pwersa ngan han katawhan ha Eastern Visayas an Bagong Hukbong Bayan ha ika-52 nga anibersaryo hini hadton Marso 29. Ginhahatagan nira han hitaas nga pagsaludar an ngatanan nga Pula nga mangaraway ngan kumander, mga kadre han Partido, ngan mga aktibista nga naserbe ha katawhan, labina adton naghalad han kinabuhi para ha rebolusyon.

Ginseselebrar han BHB an usa na liwat katuig han mga kadaugan ngan leksyon ha butnga han todo-gerra han rehimen Duterte. Ha kabaryuhan, haros upat katuig na nga tango-ha-tango nga nakikiggitay an BHB ngan an masa nga parag-uma ha mga tropa han AFP-PNP. Kada tuig nagdedeklara an rehimen han dedlayn han pagpuhan ha rebolusyunaryo nga kagiusan, kundi kada tuig liwat ini ginpapakyas han BHB ngan masa.

Grabe kamahugaw an kontra-rebolusyunaryo nga gerra ni Duterte. Diri la mga kombatant an gintatarget

hini, bisan mga sibilyan nga komunidad ginpapailarum ha ira balaud militar. Gatus-gatos nga tropa an nagbababad ha mga baryo agud manhadlok, man-gipit, magpasurender, manhugay, ngan bungkagon an pagkakaurusa han mga taghimaryo. Patakas hira nga nanmumusil, nanmomomba, ngan nang-aabusu. Gintatarhug, ginsasaywar, o kolektibo nga ginsisirutan an mga tawo. Hin-o man an diri nakikigkooperar ira gintatahapan nga "terorista." Tuyo nira nga utdon an sumpay giutan han BHB ngan masa.

Kundi pakyas ini nga larang han kaaway. Nagpapabilin an mahugot nga sumpay han BHB ngan katawhan. Bisan ha mga militarizado nga baryo, maungod nga nakakagios an mga yunit han BHB, mga sanga han Partido, mga rebolusyunaryo nga organisasyon masa ngan an yunit milisya. Mahimuon nira nga naipapadayon an buruhaton propaganda, edukasyon, ngan panmasa nga kampanya. Ha buligay han masa ngan BHB, nakakalansar hira han mga taktikal nga opensiba

PNP-SAF nga nangistraping han sibilyan, dayon nga ginsirutan han BHB

DAYON NGA GINSIRUTAN han serye han mga atritibo nga aksyon han Bagong Hukbong Bayan-Rodante Urtal Command (BHB-RUC) an mga tropa han PNP-Special Action Force (PNP-SAF) nga pira kabises nangistraping han mga sibilyan ha Brgy. Cuenco, Las Navas, Northern Samar.

Usa nga pulis an patay ngan usa pa an samaran kahuman nga susru-nod nga harason han BHB-RUC an mga nag-ooperasyon nga tropa han PNP-SAF hadton Pebrero 16 ngan 19 ha nasering nga baryo.

Hadton Pebrero 15, paturapak nga ginpabuthan han mga pulis an upat nga parag-uma nga nagdadara la han humay ngadto ha usa nga umhanan apiki ha baryo. Kinabuwasan, dayon nga ginharas han BHB-RUC an kaaway dapit alas-3 han kulop. Usa nga pulis an napatay.

Komo bulos ha pag-atake, ginistraping han PNP-SAF an unom nga parag-uma apiki ha eskoylahan ha sakob han baryo. Tungod hini, napiritan nga mag-ebakwet an haros ngatanan nga residente ha Cuenco. Ginsingabot ini han mga pasista agud rekisahon an mga balay ngan tindahan, rub-on an mga purtahan, ngan kawaton an mga doble-sero, pugakhang ngan iskopeta nga gin-gagamit han masa para ha panganop. Hadton Pebrero 19, ginpabuthan han BHB-RUC an mga pasista nga tropa. Usa nga pulis an grabe nga nasamaran nga ira ginsakay ha helikopter.

Tulo na nga kaso han pangistraping han mga parag-uma ha Northern Samar an nairekord sakob la hin tulo kasemana. Nahitabo ini kadungan han mando ni Rodrigo Du-

Treyning medikal ngan BKP, nahilansar ha butnga han FMO

MANILAMPUSON NGA NAHILANSAR ha usa nga prente gerilya ha Samar an treyning medikal han mga Pula nga mangaraway ngan an Batakan nga Kursu han Partido (BKP), samtang kadungan nga gin-aatubang an nakapokus nga operasyon militar o FMO han kaaway hadin Marso.

Napulo nga istap medikal han BHB an nagin estudyante han nakatala-an nga usa kasemana nga treyning. Gin-adman nira an mga nga topiko ti-kang ha syahan ngan ikaduha nga lebel han panmedikal nga pagpahiar. Labaw nga mahinungdanon an ira pag-aram samtang padayon an pagsamwak han Covid-19 ha nasud.

Hini liwat nga prente gerilya nakahatag han *staggered* o pahuruhugna nga BKP ha mga residente han usa nga baryo. Tikang 18 ngada 28 katawo an nakaatendir ha nasering nga pag-aradman. Padayon pa gi-hapon an pagdumara han kurso.

Nahimo an mga pankonsolidasyon nga aktibidad ha butnga han dirudiretso nga FMO ngan ginpakusog nga presensya han militar ha nasering nga prente. ■



Mga nagtutuyaw nga tropa han 19th IB, nag-misencounter

NAGPUSIL HAN IGKASI sundalo an nagtutuyaw nga mga elemento han 19th Infantry Battalion han mag-misencounter ha Brgy. Deit de Suba, Silvino Lobos, Northern Samar hadton Marso 3.

Sigon ha BHB-Rodante Urtal Command, nagrobing an mga sundalo nga nagpopostura nga yunit han BHB samtang nakasulot hin kamisa tsino ngan botas. Han mahikatapo an igkasi nira sundalo nga nakatambay ngan nakauniporme, ginpanmusil hira. Lima nga tropa an nasamaran ngan posible nga mayda pa napatay tungod han ira balyuay han buto.

Nahitabo an *misencounter* ha butnga han haros lima kabulan nga nakapokus nga operasyon militar han 19th IB ha nasering nga bungto ngan karaknit hini nga Las Navas, Pambujan, San Roque ngan Catubig.

Ha pinakaurhi nga kaso han pangabuso han gin-ngaranan nga "massacre battalion," usa-usa nira nga gin-iinterogar an mga kaapi han barangay konseho han Brgy. Geparayan de Turag, Silvino Lobos, hin disoras han gab-i. Ginpatawag liwat an mga residente ha assemblya ngan ginpapasurrender. ■

"Magpursige...", tikang ha paypay 1

kontra ha mga kaaway. Diri ulang an mahugaw nga gerra ni Duterte agud makahaum an katawhan ha presente nga sitwasyon ngan igpadayon an rebolusyunaryo nga pakigbisog.

Kun waray rebolusyunaryo nga hukbo, waray bisan ano an katawhan. Labina gud yana, mas ginkikinahanglan han katawhan an iya hukbo. Ha ira hukbo nakuha hin kaisog ngan determinasyon nga umato an katawhan. Nananawagan an katawhan ha BHB nga depensahan hira, pahugton an pakig-usa hini ha masa nga parag-uma, ngan padayon nga pakyason an gerra han pasista, kurap, terorista, ngan uhaw-hadugo nga hi Duterte. ■

"PNP-SAF...", tikang ha paypay 1

terte nga "patayon an ngatanan nga komunista" ha miting han RTF-ELCAC ha Tacloban City hadton Marso 18.

Labot han pangistraping ha Cuenco, paturapak liwat nga ginpabuthan han mga sundalo an magburugto nga Ogatcho ha Brgy. Balud, Silvino Lobos hadton Marso 6. Kinse minutos nga nagpabuto an mga tuyaw nga pasista. Napatay an usa ha ira nga hi "Ote," usa an nakatakas ngan usa an waray pa mahikit-an. Ginpabuthan an magburugto ha sapa nga labahan ha baryo nga 30 metros an distansya ha pinakahirani nga balay. Ginpasamwak han mga sundalo nga mga kaapi han BHB ngan armado han pusil an mga biktima, samtang sundang la an dara

nira.

Mga operasyon isnayp. Usa nga tropa han kaaway an nasamaran hin pabuthan ini han BHB-RUC ha Brgy. Poponton, Las Navas hadton Marso 6. Kalakip an Cuenco ngan Poponton ha diri mamenos ha 11 nga barangay ha Las Navas nga nakapailarum ha Re-tooled Community Support Program (RCSP), sugad liwat an Epaw, San Jose, Sag-od, Tagan-ayan, L. Empon, Caputoan, Lakandula, Osmeña ngan Victory.

Ha Western Samar, "one-shot, one-kill" an usa nga sundalo nga ginisnayp han BHB-Arnulfo Ortiz Command ha Brgy. Tarabucan, Matuguinao hadton Pebrero 4. ■